

JAUNAREN PIZTUERAKO PAZKO IGANDEA (C)

Eguneko Meza

Otoitza

Jainko Jauna,
 egun honetan heriotza garaitu duen zure Semearen bidez,
 betiereko biziaren ateak zabaldu dizkiguzu;
 iguzu, gure Jaunaren piztuera ospatzen dugunok,
 Espiritu Santuak berriturik,
 geure piztuera itxaropenean bizi gaitezela.
 Zure Seme Jesu Kristo.

I. IRAKURGAIA: Ap Eg 10, 37-43

*Hilen artetik piztu ondoren
 Harekin jan eta edan genuen.*

Apostoluen Eginetatik

Egun haietan, Pedrok honela esan zuen: «Badakizue zer gertatu zen, Galileatik hasi eta Judea osoan, Joanek erakutsitako bataio ondoren: Nazaretoko Jesusena, alegia, Jaungoikoak Espiritu Santuaren indarrez gantzutua; eta on egiten eta deabruak hartutako guztiak sendatzen igaro zena: Jaungoikoa Harekin baitzegoen.

Gu gara, Hark judutarren lurretan eta Jerusalemenean egindako guztien testigu. Haiek, habe batetik zintzilikatu eta hil egin zuten. Baina, hirugarren egunean Jaungoikoak piztu egin zuen, eta agertzea eman zion; ez, ordea, herri guztiari, Jaunak lehendik aukeratutako testigui baizik: guri, Hura hilen artetik piztu ondoren, Harekin jan eta edan genuenoi.

Eta agindu zigun, herriari erakus geniezaiola eta aitortu, Bera dela Jaungoikoak bizien eta hilen epaile ipini duena. Profeta guztiak egiten diote aitormen: Harengan sinesten duten guztiak hartzen dutela, Beraren izenean, bekatuen barkamena».

ERANTZUN SALMOA: Sal 117, 1-2. 16bc-17. 22-23

**R/. Hau da Jaunak egin duen eguna,
 gu pozteko eta alaitzeko eguna.**

Edota: **Aleluia, aleluia, aleluia.**

Eskerrak Jaunari, ona baita,
 Haren maitasuna betikoa baita.
 Israel etxeak hau esan beza:
 «Haren maitasuna betikoa.» R/.

«Jaunaren eskuinak nau altxatu,
 Jaunaren eskuina bizkor da jokatu.»

Hil ez, baino bizi naiz egingo,
Jaunaren eginak nik oihuegingo. R/.

Etxegileek baztertutako harria,
berori gertatu da giltzarria.
Jaunak egin du hori,
gure begien harrigarri. R/.

II. IRAKURGAIA: Kol 3, 1-4

*Zabiltzate goi ondasunen bila,
han baitago Kristo.*

San Paulo Apostoluak Kolosarrei

Senideok: Kristorekin berpiztu zaretenez gero, zabiltzate goi ondasunean bila, han baitago Kristo Jaungoikoaren eskuin aldean jarririk. Irrika itzazue goiko ondasunak, eta ez lurrekoak. Hil baitzarete; eta zuen bizia Kristorekin Jaungoikoarengan ezkutaturik dago. Gure bizia den Kristo agertuko denean, zuek ere agertuko zarete aintzaz Harekin batean.

Edota: 1 Ko 5, 6b-8

*Bazter ezazue legami zaharra,
ore berri izan zaitezten.*

San Paulo Apostoluak Korintotarrei

Senideok: Ez al dakizue, legami apur batek ore guztia harrotzen duela? Bazter ezazue legami zaharra, ore berri izan zaitezten, ogi hila zaretenez gero. Opari eskainia izan baita Kristo, gure pazko-bildotsa. Ospa dezagun, beraz, Pazko-jaia, ez legami zaharrarekin —ez ustelkeriazko eta gaitakeriazko legamiarekin—, egiaren eta zintzotasunaren ogi hilekin baizik.

Neurtitza

Hil zuten pazko-bildotsa
goretsi, bai, kristauok.

Bekatutan geundenok
Kristo errugabeak baketu gintuen
Aitarekin.
Herio eta biziak
burruka latz gogorra:
hilik ere Kristo bizirik da.

Esazu, Maria:
Zer duzu ikusia?

«Berpiztuaren hobia,
bizirik den Kristoren argia.
Aingeru aitortle,

hil oihal eta jantziak.
Piztu da Kristo, itxaron!
Aurretik duzue Galilean».

Badakigu, piztu dela hilengandik egiaz:
Erruki zakizkigu, gure Errege!
Amen, Aleluia!

EBANJELIOA: Jn 20, 1-9

Aleluia: 1 Ko 5, 7b-8a

R/. Aleluia.
V/. Opari eskainia izan da Kristo,
gure Pazko bildotsa
Ospa dezagun, beraz, Jaunarengan. R/.

Piztu egin behar zuen hilen artetik.

Jesu Kristoren Ebanjelioa San Joanen liburutik

Astearen lehenengo egunean, Maria Magdalena hilobira joan zen goizean goiz, oraindik ilun zegoela; eta harria hilobitik kendua ikusi zuen. Lasterka batean, Simon Pedrorengana eta Jesusek maite zuen beste ikasle harengana joan, eta esan zien: «Hilobitik eraman egin dute Jauna, eta ez dakigu non jarri duten».

Atera ziren Pedro eta beste ikaslea, eta hilobira abiatu ziren. Biak batera zihoazen lasterka; baina beste ikasle hark, Pedro baino bizkorrago ibilita, aurrea hartu zion, eta lehenago iritsi zen hilobira. Begiratu zuen eta lurrean oihalak ikusi zituen, baina ez zen sartu.

Iritsi zen atzetik Pedro ere, sartu zen hilobian eta ikusi zituen oihalak lurrean; buru gainean edukitako zapia, ordea, ez zegoen oihalekin batera, alde batean bildua baizik.

Orduan, sartu zen hilobian lehendabizi iritsitako ikasle hura ere; ikusi zuen, eta sinetsi; ordurarte ez baitzuten ulertu Liburu Santuak dioena: «Piztu egin behar zuela hilen artetik».

Oparigaien gainekoa

Pazko pozetan eskaintzen dizugu, Jauna, opari hau:
beronek sortzen du eta janaritzen
harrigarriro zure Eliza.
Jesu Kristo.

Prefazioa: Pazkoaldikoa.

Jaunartze ondorengoa

Jainko Aita,
zaindu ezazu zeure Eliza maitasun haundiz,
Pazko sakramentuez berriturik,
piztueraren argira irits dadin.
Jesu Kristo.

Pazko-agurra

V/. Zoazte Jaunaren bakean, aleluia, aleluia.

R/. **Eskerrak Jainkoari, aleluia, aleluia.**